

**Manfaat Belanjawan 2012 Diperjelas Menerusi Sesi Penerangan Seluruh Negara
Bernama
13 Oktober , 2011**

SEREMBAN, 13 Okt (Bernama) -- Kementerian Penerangan Komunikasi dan Kebudayaan sedang menyusun program penerangan seluruh negara bagi menjelaskan faedah yang dinikmati rakyat menerusi Belanjawan 2012 yang dibentangkan oleh Perdana Menteri Datuk Seri Najib Tun Razak pada Jumaat lepas.

Menteri Penerangan Komunikasi dan Kebudayaan Datuk Seri Dr Rais Yatim berkata sesi penerangan itu akan dibuat secara mudah agar dapat difahami rakyat dan tajuk yang hendak digunakan ialah 'Apa Saya Dapat' atau 'Tahukah Anda'.

"Sebagai contoh, apa yang diperolehi oleh seseorang guru menerusi belanjawan ini...sudah tentu ia melibatkan kenaikan gajinya, kenaikan pangkatnya, umur bersaranya dan sebagainya. Begitu juga dengan seseorang murid di mana murid sekolah yang hendak masuk penggal pertama 2012...apa yang kerajaan berikan kepada mereka ini? Kenapa diberi RM100, misalnya.

"Cara ini lebih mudah daripada kita berceramah panjang lebar menghujahkan sesuatu.

Tinggal lagi pembangkang, misalkan, akan terus mengelirukan pandangan rakyat. Yang utamanya ialah apa rakyat dapat atau apa saya dapat daripada belanjawan ini," katanya kepada pemberita pada majlis bersama pegawai Jabatan Hal Ehwal Khas (JASA) Negeri Sembilan di sini hari ini.

Rais berkata meminta JASA dan Jabatan Penerangan, Jabatan Penyiaran dan lain-lain yang berkaitan dengan memberi penjelasan dan penerangan, agar menyediakan polar dan bahasa yang mudah supaya setiap segmen masyarakat faham apa yang diperolehi mereka daripada belanjawan itu.

"Inilah hajat kami," katanya.

Rais berkata sesi penerangan itu akan turut melibatkan Radio Televisyen Malaysia (RTM) dan juga menerusi penyebaran risalah yang mudah difahami.

"Memang saya berpendapat, ini belanjawan terbaik dalam abad ini, tetapi bagaimana kita menceritakannya, inilah keadah-keadah yang saya harap kita dapat susul dan buktikan kepada rakyat," katanya.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=619668>